

Namminersornerullutik Oqartussat umimmaat piniagaanerat pillugu nalunaarutaat

Piniarneq aallaaniarnerlu pillugit inatsisartut inatsisaanni nr. 12, 29. Oktober 1999-imeersumi § 2, imm. 3-4, § 4, §§ 7-8, §§ 12-13, § 16, § 17, imm. 2 aamma § 18 malillugit aajangersarneqarput:

Atuuffii

§ 1. Una nalunaarut atuuppoq umimmaat (*Ovibus moschatus*) Kalaallit Nunaanni killilersukkamik piniagaanerannut.

Imm. 2. Eqqissimatitsineq, inuussutissarsiornermut sunngiffimmilu piniartunut pisassiisarneq aammalu akiliilluni piniartitsinerlut pisassiissutit, nunat piffissallu umimmanniarfusussat aamma piniariaatsinut tunngasut Namminersornerullutik Oqartussat umimmaat eqqissimatitaanerut pillugu nalunaarutaanni aalajangersakkat malippaat.

Imm. 3. Inuussutissarsiornermut naalakkersuisup imm. 2-mi nunat piffissallu piniarfissatut aalajangikkat agguataaqqissinnaavai. Nunanik piffisanillu piniarfissanik agguataareqqinneq pisinnaavoq Piniarneq Pillugu Siunnersuisoqatigiit aamma allat attuumassuteqartut isumasioreerlugit.

Imm. 4. Akiliisitsilluni umimmanniarnermi Namminersornerullutik Oqartussat akiliisitsilluni aallaaniarneq aalisarnerlu pillugit nalunaarutaanni aalajangersakkat malippai.

Pisassiissutiniq agguaaassineq

§ 2. Piniarneq Pillugu Siunnersuisoqatigiit inassuteqarneratigut Inuussutissarsiornermut naalakkersuisup Kangerlussuup eqqaani umimmattassatut aalajangikkat kommuninut sumiiffinnulluunniit kommunit aggornerisa avataaniittunut agguaatissavai.

Imm. 2. Inuussutissarsiornermut Pisortaqarfiup Ivittuut kommuniani, Ittoqqortoormiit kommuniani aammalu Qaanaap kommuniani kommunalbestyrelsit inassuteqarneratigut pisassiissutigineqartut kommuneni pineqartuni inuussutissarsiutigalugu aamma sunngiffimmi piniartunut agguaatissavai. Ivittuut kommunianut tunngatillugu tassani kommunalbestyrelsi kommuninut aamma kommunit agguataarnerisa avataaniittunut, pisassiissutiniq agguaaassissaaq pineqartuni kommunalbestyrelsi bogerrådiluunniit isumasioreerlugu.

Imm. 3. Ukiumut pisassiissutit piumasaqaatillu taakkununga tunngasut tusagassiuutitigut nunamut tamarmut annguttartutigut avammut tusarliunneqassapput umimmanniarnissaaq sioqqullugu.

Akuersissutiniq tunniussineq

§ 3. Kangerlussuup eqqaanut, Ittoqqortoormiit kommuniannut pisassiissutigineqartut piniarneqarnisaannut, tak. § 2, imm. 2-mi oqaaseqatigiit kingulliit, qinnuteqartunut atuuttumik

piniaernermut allagartalinnut kommunimilu pineqartumi innuttaasutut nalunaarsorsimasunut kommunalbestyrelsi akuersissutininik tunniussissaaq.

Imm. 2. Sumiiffinni kommunit aggornerisa avataaniittuni qinnuteqartunut piniaernermut atuuttumik allagartalinnut tassanilu najugalittut nalunaarneqarsimasunut akuersissutininik najukkami borgerrådi tunniussissaaq, takuuk § 2 imm. 1.

Imm. 3. Ivittuut kommuniani Qaanaallu kommuniani qinnuteqartunut piniaernermut atuuttumik allagartalinnut aamma Ivittuuni Qaanaamiluunniit najugalittut nalunaarneqarsimasunut kommunalbestyrelsi akuersissutininik tunniussissaaq. Kommunit allat, sumiiffilluunniit kommunit aggornerisa avataaniittut Ivittuunit kommunianit pisassinneqarsimappata, pineqartuni kommunalbestyrelsi borgerrådiluunniit isumasioreerlugit kommunalbestyrelsi imaluunniit borgerrådi akuersissutininik tunniussissaaq.

§ 4. Kommunimi inuussutissarsiutigalugu piniaernermut allagartalinnut qinnuteqartunut akuersissutininik tunniussinnermi sapinngisamik qinnuteqartut akuersissutininik amerlaqatigiinnik pissarsinissaat anguniarneqartassaaq. Tamanna pisinnaanngippat akuersissutininik sinneruttunik agguaaneq makitsinikkut ingerlanneqassaaq.

Imm. 2. Sunngiffimmi piniaernermut allagartalinnut qinnuteqartunut akuersissutininik agguaassineq makitsinikkut pissaaq.

Imm. 3. Makitsinermut atatillugu akuersissutininik agguaassisussaataasup utaqqisut allattorsimaffiat tulleríiaarinertalik pilersissavaa, taannalu atuutilissaaq akuersissutininik agguaasseqqinnermi, takuuk § 5, imm. 2.

Imm. 4. Makitsineq ingerlanneqassaaq innuttaasunit kikkunilluunniit malinnaavigineqarsinnaasumik.

§ 5. Akuersissutininik agguaassisussaataasup akuersissutit tunniunneqartut kingusinnerpaamik qaqugu aaneqareersimanissaat killilissavaa. Inuit akuersissummik tunineqarsimasut akuersissummilli atuisinnaanngitsut imaluunniit atuerusunngitsut piaarnerpaamik akuersissut atorineqanngitsoq akuersissutininik agguaassisussaataasumut utertissaavaat.

Imm. 2. Akuersissutit atorineqanngitsoortut agguaateqqinneqassapput. Agguaasseqqinnerli piaarnerpaamik aatsaat pisinnaavoq umimmaniarnerup uninnissaa sap. ak. marlunnik sioqqullugu, akuersissutininik pinissamik utaqqisut tulleríiaakkat allattorsimanerat malillugu.

Piniarnissamut piumasaqaatit

§ 6. § 3 malillugu akuersissutininik inuit pisimasut kisimik umimmassinnaapput.

Imm. 2. Akuersissut inummumut atiatigut taasamut taamaallaat atuuppoq allanullu tunniunneqaranilu tunineqarsinnaanani.

Imm. 3. Akuersissut ataaseq ataatsimik umimmannissamut periarfissiivoq.

§ 7. Inuussutissarsiutigalugu umimmanniarnermut akuersissummi allanneqarsinnaavoq umimmammik ilivitsumik, ilaani, amiani, nassuini il.il. tunisisoqarsinnaasoq uumasut nakorsa qarfianiit akuerineqarsimasumut neqileriffimmut imaluunniit tunitsivimmut.

§ 8. Aasaanerani ukiaanerani piniarnissamut akuersissutininik agguaanneqarnerannut peqataasinnaassagunik qinnuteqaateqartut allagartaq ukiumi pineqartumi kingusinnerpaamik majip aallaqqaataani akilereersimassavaat.

Imm. 2. Piumasaqaataavortaaq sunngiffimmi piniaernermut allagartalik akuersissummik qinnuteqartoq qinnuteqarnermini 16-inik ukioqalereersimanissaa.

Kommuunit ileqqoreqqusaat

§ 9. Kommunalbestsyrelsi nalunaarummi §§ 7-8-mut piumasaqaatinit sakkortunerusunik kommunip maleruagassiaatigut piumasaqaateqarsinnaavoq. Kommunip ileqqoreqqusaa Naalakkersuisunut ilaasortamit atortussanngortinneqassaaq.

Nakkutilliineq

§ 10. Inuit § 3 malillugu umimmanniarnissamut akuerineqarsimasut, akuersissummut ilanngullugit umimmammut ataatsimut ikkutassanik ataasarlugit atugassanik marlunnik, assigiinnik normulikkanik, tunineqassapput kingusinnerusukut umimmattamut uppersaaitut atugassanik.

Imm. 2. Umimmaap pisarineqarnerata kinguinnguatigut, kingusinnerpaamillu umimmak angallammut assartuissutissamut ikineqarpat, ataasiaannarlugit atugassat taakku quttoraanut qajannaatsumik erseqqissunngorlugillu ikkunneqassapput.

Imm. 3. Ataasiaannarlugit atugassat umimmammi ikkusimaannassapput tunineqarnissaata atorneqarnisaataluunnit tungaanut.

Imm. 4. Ataasiaannarlugit atugassat taakku tunniunneqartut atorneqanngitsoortulli piaarnerpaamik, kingusinnerpaamillu sap. ak. 3-t umimmanniarnerup uninnerata kinguinngua kommunimut utertinneqassapput. Taava kommunip piaarnerpaamik kingusinnerpaamilli sap. ak. 5-t umimmanniarnerup uninnerata kingorna ataasiaannarlugit atugassat atorneqanngitsoortut Inuussutissarsiornermut Pisortaqarfimmut nassiutissavai.

Imm. 5. Pisassiissutini umimmattat tamarmik Piniarneq-mi pisanik nalunaarsuiffikkut nalunaarutigineqassapput.

§ 11. Kinaluunniit politiinit, piniarnermik aallaaniarnermillu nakkutilliisunit allanilluunniit Inuussutissarsiornermut Pisortaqarfimmit taamaaliornissaannut immikkut pisussaaffilerneqarsimasunit piumaffigineqaruni umimmanniarsinnaatitaanini uppersaqqullugu, taava piniarnermut allagartaq atuuttoq, umimmanniarnissamut akuersissut umimmattamullu nalunaaqutsiutassat takutissinnaasariaqarpai.

Pineqaatissiisutit

§ 12. §§ 6-7-mik, § 10, imm. 2-5 aamma § 11-mik unioqutitsinerit akiliisitsinermik pineqaatissiisutaasinnaapput.

Imm. 2. Neqi, ameq allallu umimmammeersut § 6, imm. 1 aamma imm. 3 unioqutillugu umimmattameersut arsaarinnissutigineqarsinnaapput Naalagaaffiup karsianut iluaqutissanngorlugit.

Imm. 3. § 7 malillugu kommunip ileqqoreqqusaani kommunalbestsyrelsi aalajangiisinnaavoq maleruagassiamik unioqutitsineq akiliisitsinermik kinguneqarsinnaasoq.

Atulersitsineq il.il.

§ 13. Nalunaarut una atuutilerpoq 15. februar 2001.

Imm. 2. Peqatigitillugu Namminersornerullutik Oqartussat umimmaat eqqissisimatitaanerat piniagaaneralu pillugu nalunaarutaat nr. 11, 26. juni 1999-imeersoq atorunnaarpoq.

Namminersornerullutik Oqartussat, ulloq 8. februar 2001.

Simon Olsen

/

Jørn Birk Olsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut